

"ՎԱՎԵՐԱՅՆՈՒՄ ԵՄ"
ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՆԱԽԱԳԱՀ Ռ. ՔՈՉԱՐՅԱՆ

"21" հունիսի 2006 թ.

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ
ՈՐՈՇՈՒՄ

1 հունիսի 2006 թվականի N 827-Ն

ՄՇԱԿՈՒԹԱՅԻՆ ԱՐԺԵՔՆԵՐԻ ԺԱՍԱՆԱԿԱՎՈՐ ՆԵՐՄՈՒԾՄԱՆ ԿԱՐԳԸ
ՍԱՀՄԱՆԵԼՈՒ ՄԱՍԻՆ

"Մշակութային արժեքների արտահանման եւ ներմուծման մասին" Հայաստանի Հանրապետության օրենքի 16-րդ հոդվածի 2-րդ մասին համապատասխան՝ Հայաստանի Հանրապետության կառավարությունը որոշում է.

1. Սահմանել մշակութային արժեքների ժամանակավոր ներմուծման կարգը՝ համաձայն հավելվածի:

2. Սույն որոշումն ուժի մեջ է մտնում պաշտոնական հրապարակման օրվան հաջորդող տասներորդ օրը:

ՍՏՈՐԱԳՐՎԵԼ Է ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՎԱՐՉԱՊԵՏԻ ԿՈՂՄԻՅ
2006 ԹՎԱԿԱՆԻ ՀՈՒՆԻՍԻ 16-ԻՆ

Հավելված
ՀՀ կառավարության
2006 թվականի հունիսի 1-ի
N 827-Ն որոշման

ԿԱՐԳ

ՄՇԱԿՈՒԹԱՅԻՆ ԱՐԺԵՔՆԵՐԻ ԺԱՍԱՆԱԿԱՎՈՐ ՆԵՐՄՈՒԾՄԱՆ

1. Սույն կարգով սահմանվում է մշակութային արժեքների ժամանակավոր ներմուծման գործընթացը՝ "Ժամանակավոր ներմուծում" մաքսային ռեժիմով:

2. Մշակութային արժեքներ ժամանակավոր ներմուծելիս՝ հայտարարատուն մաքսային մարմին է ներկայացնում հայտարարագիր, մշակութային արժեքներն ու դրանց լուսանկարները (3 օրինակից):

Լուսանկարների բացակայության դեպքում հայտարարատուն իր միջոցներով, մաքսային հսկողության ներքո, իրականացնում է մշակութային արժեքների լուսանկարումը:

Լուսանկարները ներկայացվում են Հայաստանի Հանրապետության մշակույթի եւ երիտասարդության հարցերի նախարարության (այսուհետ՝ լիազորված պետական մարմին) սահմանած պահանջներին համապատասխան:

3. Մաքսային մարմնի պաշտոնատար անձը մշակութային արժեքները համեմատում է լուսանկարների հետ՝ դրանց դարձերեսներին լրացնելով մշակութային արժեքների տվյալները (տեսակը, անվանումը կամ վերնագիրը, հեղինակը, ստեղծման ժամանակը, ստեղծման վայրը, նյութը, չափերը (քաշը), բաղկացուցիչ մասերի թիվը, վիճակը):

Մշակութային արժեքների առանձին տվյալների՝ հեղինակի, ստեղծման ժամանակի, ստեղծման վայրի, նյութի ճշգրտման անհնարինության դեպքում նշվում է "անհայտ" բառը:

4. Մշակութային արժեքներ ժամանակավոր ներմուծելիս՝ մաքսային ձեռնարկումների առանձին գործողություններ կարող են իրականացվել Հայաստանի Հանրապետության օրենսդրությամբ սահմանված կարգով՝ մաքսային ձեռնարկումների համար սահմանված վայրերից դուրս:

5. Մաքսային մարմնի պաշտոնատար անձը լուսանկարների դարձերեսներին լրացված տվյալները շրջագծում է, հաստատում անձնական կնիքով եւ մաքսային օրենսդրությամբ

սահմանված կարգով ձեռակերպում դրանց ժամանակավոր ներմուծումը՝ "Ժամանակավոր ներմուծում" մաքսային ռեժիմով:

Մաքսային մարմնի պաշտոնատար անձի կողմից կնքված մշակութային արժեքների լուսանկարների մեկ օրինակը պահվում է մաքսային մարմնում, մեկը տրվում է հայտարարատուին, իսկ երրորդ օրինակը՝ լիազորված պետական մարմնին:

Մշակութային արժեքների կնքված լուսանկարները հիմք են հետագայում մաքսային ձեռակերպումների նպատակով դրանց նույնականացման համար: Անհրաժեշտության դեպքում մաքսային մարմինն իրավասու է իրականացվող աշխատանքներին Հայաստանի Հանրապետության օրենսդրությամբ սահմանված կարգով ներգրավելու պետական իրավասու մարմինների մասնագետների եւ փորձագետների:

6. Ժամանակավոր ներմուծվող մշակութային արժեքների մաքսային սահմանով բացթողումից հետո՝ 5-օրյա ժամկետում մաքսային մարմինը մշակութային արժեքների ներմուծման մասին գրավոր (պատվիրված մամակով) տեղեկացնում է լիազորված պետական մարմնին՝ կցելով լուսանկարների մեկ օրինակը: